

Vūvū kei Moro

Yaca - Manasa Nukuvou  
Koro - Naivilaca, Noco, Rewa.  
Tikinisiga - 5/86.  
Koya e katona - Eliko Qolivono Masa.

E na dua na siga, e dua jiko na nīmamu kalouvū, na yacana jiko o Vūvū. E na dua na siga, sã cocoka tiko e na dua na batini wai, dua na bāravi, e yaca ni bāravi oyā o Tauluga. Sã cocoka tiko vaqō o koya, qai vūkici koya tiko me dua tiko na gonelailai sara, e savu tū na nona luka.

Ša qai dua na waqaniviti sã vakarewa mai. Taukei ni waqaniviti qō e qai sara tiko mai Beqa, e kauta tiko mai na nodra vū tale gā mai Beqa, o Moro. Ā qai tiko mai o Moro, e qai tiko mai na dua na sōlevu e na dua na yanuyanū, levu sara tū mai na kena ivāqā. Sã yaco mai Tauluga, sã raici Vūvū ni sã cocoka tiko e na bāravi yā.

E qai nānuma sara o Moro me sã vakavodoki Vūvū me lai nimata toka na nona waqa. Sã qai vakavodoki Vūvū sara, sã tukuna sara vuā,

"Toka sara e loma ni dreke qori, sō na bulagi e tū qori, kē o via kana, qai kania tōka".

Oti yā, sã rau qaiqai tiko, vōleka mai Nukulau, sã vuka i wai e dua na sova kākana a vakavōdoka tū mai na ivāqā kī Moro, sã vuka i wai ni sã lala. Vakalailai tale gā sã bai raica tale o Moro ni sã bai vuka tale i wai e dua tale na isū kākana levu sã lala. Sã raica ni sã viavia lala taucoko mai na iokaoka ni isū a kauta tiko mai o Moro sã via taqayā, sã qai vakamasuti Vūvū me yalovinaka me sã lesu tale i nodratou. E dausiga tū o Beqa. Ia ni rau sã voleka yani i matāsawa, i Beqa, sã raica tū o Vūvū ni sīnai tū i matāsawa na vatu.

"Tukuna gā o iko noqu itau ni dausiga tū o Beqa, ia na kākana gā sã tū qō".

Ā qai vīcanuyaka o koya na vatu ā tū e matāsawa i lomana. E keā sã vakā me sã rere mai kina o Moro, sã kilā o koya, na qase qō kēvā e na tiko vakadedē ikē, e na dausiga sara o Beqa. Ā qai lāvaka o koya, sã qai tukuna o koya vī Vūvū,

"Sa na vakarau ra caka kemu kākana mada na yanuyanū o Beqa".

Dua na siga sa ra qai vāvavi, sã caka na kena. Ia na kākana taucoko era cakava qō, e kania otī gā vakadua o Vūvū.

Sã qai drō o Moro e na dua na siga. Sã rerevaka na kã sã vīcakayaka o Vūvū. Sã qai lai vuni tū va na dua na tobu wai i kiã. Ia e vōleka tale tiko gā na vana sã lai vuni tiko kina oyã e dua tale na tobu.

Sã qai yani o Vūvū sã raica sara ni rua na tobu rau sã tū. E dua e lāmata vinaka tū, dua sã burē nō. Ia sara tū vaqō o Vūvū nē,

"Kō gā e lāmata, medra na tūruga, kō gā a vuvu nō qō, yã na mīmamu na bokala".

Qai todrou va na tobu yã o Vūvū, yacova sara ni sã lai maca. Sã lai vakasigei baji tū mai o Moro ni sã votu māmaca tū mai. Sã qai ia sara vāqō o Vūvū,

"Ae noqu itau, cava tale o mai cakava tu i kerī?".

Sã qai dua na siga sã qai tukuna vāqō o Moro vī ira na kai Beqa mera sã caka kena qalu. Mera sã cakava vuã na kaile gaga. Sa ra qai ia na caka qalu o ira mai Beqa sa ra qai vākani Vūvū kina e na kaile. Na gauna sã kania kina o Vūvū na kaile, sã kilã o koya,

"E kē au sã mate kina".

Sã qai drō o Vūvū. Sa ra qai vakaviriki koya mai na kai Beqa. Sã qai yāvala e ketena na kaile gaga, sã qai coka na ketena. Na vanua taucoko gā e qai kina na coka ni ketena, era vīviavia tiko e na gauna qō, me tekivu sara mai Nadroga me yaco sara i Noco.

Yã beka e dua na vākāsama e nanuni tiko ni tiko mai Noco na via baleta ni vanua taucoko gā e qai mai kina o kō na vū yã e na coka ni ketena, oyã e kune kina na via.

Sa i koya beka oyã na kena levu.